

# 1 TESARONIKA

## Pauru Nymerohpyry Tesaronika põkõ Neneryme 1 Tessalonicenses Ekarotopo

Pata Tesaronika kowenu esaryme kynexine Masetonia nonory po, seroae Kerexia nonory po. Omi kurã Jezu Kyrixtu poko tokarose eya xine exiryke Pauru a Jezu tonetupuhse Tesaronika põkomo a. Moro toehse Pauru ytotoöpõpyry asakoro ahtao. Moro pata po Jezu poetory tõ zehno juteu tõ kynexine; typatarykõ poe Pauru tõ taropose eya xine. Naeroro toepase toto Perea pona. Imeïpo Korõtu po Pauru ahtao omi toehse eya Timoteu wino Jezu poetory tõ poko Tesaronika po (1 Tesaronika 3.6).

Sero *1 Tesaronika* taropose Pauru a Jezu poetory tõ neneryme Tesaronika po. Tynymerohpyry ae toto akorehmary se kynexine torëtyke pyra toto ehtohme aorihtyã ësemamyry ropa poko, otoko ahtao Jezu oehnõko ropa mana roropa. Toto amorepary se kynexine kypyno xine Ritonõpo ehtoh poko.

### **Sero pape ao**

Osekarotopo *1.1*

Omi kurã Jezu poko tokarose Tesaronika po  
*1.2–3.13*

Ritonõpo zamaro kuehtohkomo *4.1–12*

Jezu Kyrixtu Kuesëkõ oepyyry ropa *4.13–5.11*

Tuaro ehtoh tonõ, osekazumatopo *5.12–27*

## Kure tyripotopo 5.28

<sup>1</sup> Ynanymerohpyry moro onenerykõme. Taro ynanase ywy, Timoteu, Xira, enara. Ywy ase Pauru.

Amarokõ Jezu poetoryme Tesaronika po. Ritonõpo poetoryme matose, Kumykõ poetoryme, Kuesëkõ Jezu Kyrixtu enetuputyryke oya xine.

Kure rokë oriporykõ se ase Ritonõpo a, torëtyke pyra oriporykõ se roropa ase eya.

### *Jezu enetupuhtopõpyry Tesaronika põkomo a*

<sup>2</sup> “Kure mase, Ritonõpo,” äko ynanase opoko xine. Oturukehpyra ynanase opoko xine Ritonõpo a.

<sup>3</sup> Kuesëkõ Jezu Kyrixtu enetuputyryke oya xine imehnõ akorehmäko matose. Ritonõpo se oexirykõke, imehnõ pyno roropa oexirykõke erohnõko matose Jezu ekarory poko. Jezu oepyyropa eraximaryke oya xine aomipona matose. Moro poko oturukehpyra ynanase opoko xine Ritonõpo Kumykõ netaryme.

<sup>4</sup> Ynara zuaro ynanase, Ritonõpo opyno xine mana. Tymenekase eya matose. Typoenõme tyrise eya matose.

<sup>5</sup> Jezu poko oururukohtao yna a yna omiry rokë kara nexiase. Yna tyjamihtanohse Kurã Zuzenu a, Jezu poko ourutohkõme. Ajohpe pyra ynanekarohpyry oya xine Jezu poko. Tone-tupuhse yna a roropa. Kure ynanexiase amaro xine. Zuaro matose. Tymõkomoke se pyra ynanexiase. Äkorehmarykõ se rokë ynanexiase.

<sup>6</sup> Yna typoenohse oya xine, Kuesëkõ roropa typoenohse. Tyyryhmase iirypyrymãkomo

a amarokõ repe. Yrome Ritonõpo omiry mapoiatose. Tãtãkyemase amarokomo Kurã Zuzenu poe.

<sup>7</sup> Morarame zae oexirykõ tonese imepỹ põkomo a, Jezu poetory tomo a Masetonia põkomo a Akaia põkomo a, enara.

<sup>8</sup> Ynanekarohpyry Jezu poko tokamose ropa oya xine Masetonia põkomo a, Akaia põkomo a, emero pata tõ punero. Oturũko toto Ritonõpo enetuputyry poko oya xine. “Mokaro Tesaronika põkõ orẽpyra Ritonõpo enetupuhnõko mã toto,” ãko toto opoko xine. Morara exiryke oturupyra ynanase opoko xine tuaro toto exiryke.

<sup>9</sup> Imehnõ pata tõ poro ekãtõko toto yna ytotopõpyry poko oya xine. “Kure rokẽ oseya mã toto, Pauru tõ maro Tesaronika põkomo. Ahno neponãmarykõ turumekase eya xine: ‘Ritõ kõ mokaro,’ kary se pyra toexirykõke, Ritonõpo Zae Exikety, Isene Exikety roropa omipona toehtohkõme.

<sup>10</sup> Imũkuru oepyry ropa momohnõko roropa Tesaronika põkõ mana,” ãko. “ ‘Kapu ae oehnõko mana. Jezu mokyro ãsemãkapohpyry ropa mokyro aorihxĩpo. Kukurãkanekõme mã ynororo, kuãnohpyra xine Ritonõpo ehtohme, emero tyyrypyhpykã wãnopyryhtao,’ ãko mã Tesaronika põkomo,” ãko mã toto opoko xine.

## 2

### *Pauru erohtopõpyry Tesaronika po*

<sup>1</sup> Wekery tomo, Ritonõpo omiry ekarose ynanytoase oya xine, ãmorepase xine. Ekurehpyra ynanexiase. Tuaro matose.

<sup>2</sup> Tutuarimapose yna repe, tyryhmase roropa Piripo po, ytopyra ro yna ahtao oya xine Tesaronika pona. Zuarō matose. Yrome amaro xine orēpyra ynanexiase Ritonōpo poe. Zae rokē ynanoturuase Jezu Kyrixtu poko. Zehnotokō zuno pyra ynanexiase.

<sup>3</sup> Zae Jezu poko kuuruatose, azahkuru pyra, iirypyryme pyra, imehnō enekunopyry se pyra roropa ynanexiase.

<sup>4</sup> “Kure matose,” tykase Ritonōpo yna a. Morara exiryke zae rokē oturūko ynanase, aomipona. Tymenekase yna Ritonōpo a Tumūkuru poko imehnō zurutohme. Ahno ākyemapory se hkopyra ynanase. Ritonōpo ākyemapory se rokē ynanase. Yna kurohtaō enēko mana.

<sup>5</sup> “Kure matose,” kara ynanexiase oya xine. Imehnō mā “Kure mase” āko oenekunohtohkōme rokene. Mokaro sã pyra ynanexiase. Otinerūkō apoitohme yna tinerūme: “Kure matose,” kapi-topyra ynanexiase. Ritonōpo zuaro mana.

<sup>6-7</sup> Āmorepanekōme ynanase Ritonōpo poe, Kyrixtu nenyohityāme yna repe. Yrome yna poko: “Kure matose, tuisamehxo,” kamexipory se pyra ynanexiase oya xine. Imehnomo a roropa morara kamexipory se pyra ynanexiase. Yrome tomeseke opoko xine ynanexiase, poeto ē samo, tumūkuru pyno exiry samo.

<sup>8</sup> Ose xine yna exiryke, Ritonōpo nekarohpyry Jezu poko ekarory se ynanexiase oya xine. Yna etapary zuno pyra ynanexiase Jezu enetupuhpory se yna exiryke, opyno xine yna exiryke roropa.

<sup>9</sup> Wekery tomo, ŷme ynanexiase yna erohtoh poko. Wenikehpyra ro hmatou yna erohtopōpyry

poko serātu ritopõpyry poko yna a. Saereme, koko ynanerokuase õkyryrykõ enahpyra ehtohme, Ritonõpo nekarohpyry Jezu Kyrixtu ãmoreparykohtao yna a.

<sup>10</sup> Yna poko imehnõ tuarõtanohnanõme matose. Ritonõpo roropa imehnõ tuarõtanohneme yna poko mana. Kure rokẽ amaro xine ynanexiase, iirypyryme pyra. Onekunohto pyra ynanexiase amaro xine, Jezu poetory tõ maro.

<sup>11</sup> Tumũkuẽ tumũkuru zururu sã ourutorỹko ynanexiase.

<sup>12</sup> Ajamihtatohkõme ynanoturuase amaro xine, Ritonõpo omipona oehtohkõme. Omuhpe pyra oehtohkõme roropa. “Ritonõpo omipona ipunaka ehtoko tãkye aehtohme opoko xine,” ynanase oya xine. Ourukehpyra xine ynanexiasene. Oeahmanekõme Ritonõpo mana, imaro tuisame oehtohkõme.

<sup>13</sup> Ritonõpo omiry totase ahtao oya xine yna omi poe, zae menetuputyatose. Ahno omiry rokẽ kara mekarootose. Ritonõpo omiry sero, mekarootose. “Kure mase Ritonõpo. Tesaronika põkõ akorehmãko mase,” ãko ynanase. Ritonõpo omiry nemyry exiryke erohnõko Ritonõpo mana enetupuhnanõ kurohtao. Toto jamihtanohnõko mana tõmipona toto ehtohme.

<sup>14</sup> Wekyry tomo, Jezu poetory tomo a tyhtomarykõ toanahtose Jutea po, tyyryhmase tahtao xine juteu tuisary tomo a. Mokaro sã matose toehse, tyhtomase oexirykõke oekyrykomo a.

<sup>15</sup> Mokaro a Jezu Kuesẽkõ toxixihmapose wewe pokona, aorihtohme. Urutõ kõ Ritonõpo poe totapase toto a. Yna taropose roropa eya xine,

zehnotokõme toexirykõke. Ritonõpo zamaro pyra toto.

<sup>16</sup> Yna akorekehkãko toto, juteutõkara maro yna otururuhtao Jezu poko toto kurãkapory se pyra mã toto Jezu a. Morara exiryke toto rypyry emãnõko. Tomãse rahkene. Seromaroro Ritonõpo toto zehno rahkene, toto wãnohnõko mana.

### *Tesaronika põkõ enery se ropa Pauru*

<sup>17</sup> Wekyry tomo, omuhpe ynanase opoko xine, okynahxo oenepyra xine yna exiryke. Yrome awaro xine ro ynanase. Oenerykõ se ynanypenekehno.

<sup>18</sup> Tuhke rokẽ yna ytory se ynanexiase oenese xine repe. Ywy roro, Pauru, jytory se exiase repe. Yrome yna akorekehkase joroko tamuru yna ytohtome monexiano.

<sup>19</sup> Mãpyra Jezu oepyry ropa ahtao, opoko xine tãkye exiõko ynanase Jezu onenetupuhkepyra oexirykõke. Ynara ãko Jezu yna a: “Kure matose ya. Zae Tesaronika põkõ mamorepatose,” ãko. Morara kary etaryke yna a tãkye kuhse exiõko ynanase.

<sup>20</sup> Jezu enetuputyryke oya xine tãkye ynanase ynanamorepatyãme oexirykõke. “Kure matose. Zae toto tamorepase oya xine exiryke,” ãko Ritonõpo yna a Jezu omipona oexirykõke.

## 3

<sup>1</sup> Morarame tomuhtapãse yna exiryke ynara tõsenetupuhse ywy, otarame taro ase Atena po, toiroro,

<sup>2</sup> kuakorõkõ rokẽ Timoteu aropotohme oya xine, ajamihtanohtokõme tõmiry ke. Ritonõpo

omi poe erohketyme ynororo, Kyrixtu poko urutõme roropa. Jezu enetuputyry poko tõturuse ynororo oya xine, orẽpyrahxo enetupuhtohme oya xine,

<sup>3</sup> poremãpyra oehtohkõme imehnomo a oryhmartykohtao. Zuarõ matose tyyryhmase awahtao xine otuarimapyrykõ warõ Ritonõpo mana. Ækorehmatorỹko roropa mana orẽpyrahxo oehtohkõme.

<sup>4</sup> Amaro xine ro yna ahtao kuuruatose. Kyyryhmatorỹko toh mana, etuarimãko sytatose, ynanase. Mame tuaro matose. Moro saaro toehse ynekarohpyry ae ro.

<sup>5</sup> Morara exiryke Timoteu aropõase okynahxo oenepyra xine jexiryke. Jezu enetuputyry warõ oexirykõ se jexiryke aropõase Timoteu. “Otarãme tukuhse toto joroko tamuru a. Otarãme toto amorepatopõpyry yna a tuenikehkapõse joroko tamuru a,” ase opoko xine.

<sup>6</sup> Seromaroro Timoteu noepyase ropa oenexĩpo xine. Turuse eya ywy opokõ xine: “Orẽpyra toto Jezu enetuputyry poko. Imehnõ pyno toehse toto. Wenikehpyra toto kypoko. Omuhpe roropa toto kypoko kysaaro,” tykase Timoteu ya.

<sup>7</sup> Morara kary etaryke yna a torẽtyke pyra toehse yna. Etuarimãko ro yna repe. Yrome tãkye ynanase, Jezu enetuputyryke oya xine.

<sup>8</sup> Tãkye kuhse ynanase orẽpyra Kuesẽkõ omipona awahtao xine.

<sup>9</sup> “Kure mase” kary se rokẽ ynanase Ritonõpo a tãkye ipunaka opoko xine yna exiryke.

<sup>10</sup> Oturukehpyra ynanase Ritonõpo a oenerykõ se yna exiryke. “Papa yna aropoko Tesaronika

põkomo a, toto amorepary se ropa yna exiryke. Zuario pyra toto ahtao zurũko ynanase orẽpyra õmiry enetupuhtohme eya xine,” ãko ynanase.

<sup>11</sup> “Papa Kapuaono, yna aropoko morotona, Tesaronika põkõ enetohme yna a,” ãko ynanase Ritonõpo a, Jezu zummy a. Kuesẽkomo a roropa morara ãko ynanase.

<sup>12</sup> “Opoetory tõ pyno mã Tesaronika põkomo. Imehnõ pyno roropa mã toto. Toto akorehmako Papa, itamurumehxo opoetory tõ pyno toto ehtohme, imehnõ pyno roropa toto ehtohme ipunaka, toto pyno yna ehtoh samo,” ãko ynanase Ritonõpo a.

<sup>13</sup> Morara ãko ynanase Ritonõpo a, ajamih-tanohtohkõme, aomipona oehtohkõme, tyyrypyhpyke pyra roropa oehtohkõme. “Iiryryryme ro mose nase,” kara opoko xine imehnõ ehtohme Kumykõ ãpataka toehse kuahtao xine, Kuesẽkõ Jezu oepyyry ropa ahtao typoetory tõ maro.

## 4

### *Ritonõpo zamaro kuexirykõ poko*

<sup>1</sup> Wekyry tomo, tuhke rokẽ morara ynanasene oya xine: “Ritonõpo omipona ehtoko, Kuesẽkõ Jezu poetoryme oexirykõke,” ynanasene oya xine. Ritonõpo zamaro matose aomipona oexirykõke. Seromaroro yronymyrymehxo Kuesẽkõ omipona ehtoko.

<sup>2</sup> Yna a ãmorepatopõpyrykõ waro matose. Kuesẽkõ Jezu omi poe kuamorepatose.

<sup>3</sup> Ritonõpo kure oexirykõ se tyyrypyhpyke pyra. Orutua komo, nohpo tõ poko pyra ehtoko. Opyxiãkõ maro rokẽ ehtoko. Nohpo tõ roropa orutua



kõ poko pyra ehtoko. Oniokõ maro rokẽ ehtoko, enara.

<sup>4</sup> Nuasemãkomo etatoko pahne, Jezu poetoryme oexirykõke typye awahtao xine kure rokẽ opyxiãkõ tyritoko. Ritonõpo waro pyra exiketõ sã pyra ehtoko.

<sup>5</sup> Nae nohpo poko exiketõ nohpo tõ osanumãko rokene ise ehxõpo. Naeroro mokaro sã pyra ehtoko. Nohpo maro opytary se awahtao xine onymenekahpyrykõ pyno nymyry ehtoko, kure rokẽ oehtohkõme imaro Ritonõpo neneryme, kure roropa oehtohkõme imehnõ neneryme.

<sup>6</sup> Jezu poetoryme oexirykõke, osenekunohpyra ehtoko. Imehnõ pyxiã poko pyra ehtoko. Morara kuuruatose pake: “Tomeseke ehtoko. Ritonõpo awãnohtorõko mana imehnõ nohpo tõ poko awahtao xine,” ynanakene oya xine.

<sup>7</sup> Kymarokõ toahmase Ritonõpo a tyryrypyhpyke pyra kuehtohkõme, Jezu sã kure kuehtohkõme.

<sup>8</sup> Yna a ãmorepatopõpyrykõ rumekaryhtao oya xine ahno rokẽ kara rumekãko matose. Ritonõpo rumekãko roropa matose, Tuzenu kurã ekarone rumekãko.

<sup>9</sup> Imehnõ Jezu poetory tõ pyno matose Ritonõpo a ãmorepatopõpyrykõ omipona. Morara exiryke osepyno oexirykõ poko pape onymerozomopyra ase.

<sup>10</sup> Emero Jezu poetory tõ pyno matose Masetonia põkomo. Yrome ynara kary se ynanase oya xine, itamurumehxo toto pyno ehtoko, ipyno xine nymyry oehtohkõme.

<sup>11</sup> Imehnõ maro atatapoiry se pyra ehtoko. Imehnõ erokuru poko torẽtyke pyra ehtoko.

Oerokurukõ poko rokẽ ehtoko etuarimara oehtokõme. Morara ynanakẽ pake.

<sup>12</sup> Kure oerokurukohtao ouno xine Jezu poetory tõ kara exīko mana. Imehnõ kyryry poko penetara exīko roropa matose, nae oexirykõke.

### *Kuesëkõ oehnõko ropa mana*

<sup>13</sup> Wekyry tomo, tuaro oexirykõ se ynanase Jezu poetory orikyry poko, atasamara oehtokõme toto orikyryhtao. Jezu poetory tõ kara emynyhmäko itamurume tyekyry tõ orikyryhtao Jezu maro toto exiry onenetupuhpyra toexirykõke. Mokaro sã oexirykõ se pyra ase.

<sup>14</sup> Ynara enetupuhnõko sytatose, Jezu towõse ropa toorihxīpo. Naeroro typoetory ekepyã ësemākãko ropa Ritonõpo mana. Toto enehpõko ropa mana Jezu maro, Jezu tonetupuhse eya xine exiryke.

<sup>15</sup> Kuesëkõ omi poe ynara kary se ynanase oya xine, orihpyra ro kuahtao xine, Kuesëkõ oepyryhtao, Jezu poetory ekepyã onuapõkara sytatose. Imaro xine onuhnõko sytatose.

<sup>16</sup> Ritonõpo nenyokyhpyry imehxo exikety omitãko mã opore. Ritonõpo rue etõko mana. Mame Kuesëkõ yhtõko kapu ae. Aorihtyã emero Kyrixtu enetupuhnanõ ësemãnõko ropa toh mana.

<sup>17</sup> Mame imaro xine onuhnõko sytatose orihpyra exiketõ maro, akuru htaka Kuesëkõ eporyse. Imaro exikehpyra sytatose.

<sup>18</sup> Moro waro oexirykõke atãkyematoko Jezu poetory tõ orikyry poko.

## 5

*Tuaro sehtone Jezu oepiry ropa symomohtone*

<sup>1</sup> Wekyry tomo, Jezu oepiry ropa waro matose. Yrome aepiry ropa pokō imerōko ase wenikehpyra oehtohkōme, tuarohxo roropa oehtohkōme.

<sup>2</sup> Omato oepiry sã, Kuesēkō oepiry mana. Tokare pyra oehnōko mana.

<sup>3</sup> Ynara karyhtao eya xine: “Emero kure sytatose,” āko toh mã repe, tuaro pyra toexirykōke. Yrome axĩ toto etuarimatoh oehnōko mana. Atarypōko mã toto, nohpo oxietūtopitory samo. Toepatohkō zupīko mã toh repe.

<sup>4</sup> Wekyry tomo, mokaro sã pyra matose tuaro oexirykōke. Oserehpyra matose, omato oepiry sã pyra Jezu oepiry oya xine mana,

<sup>5</sup> ipoetoryme oexirykōke. Tuaro matose. Tyyrypyhpyke exiketō sã pyra sytatose.

<sup>6</sup> Morara exiryke tuenikaroro nyhketō sã pyra sehtone. Tuaro sehtone. Jezu oepiry symomohtone. Etỹpyra sehtone, enara.

<sup>7</sup> Koko nyhnōko toto emero porehme. Koko etỹnōko roropa toto.

<sup>8</sup> Yrome Ritonōpo poetoryme kuexirykōke tuaro sehtone. Etỹpyra roropa sehtone. Sou-tatu tomo a pake tupuropurukō apuru tyrise. Tupuhpyrykō apuru roropa tyrise omōpyra pyrou ehtohme. Yrome kymarokō tyoro. Jezu enetupuhnōko sytatose Kuesēkōme. Ritonōpo pyno sytatose, imehnō pyno roropa sytatose. Jezu a kypynanopyrykō eraximãko sytatose apoto konōto htaka omōpyra kuehtohkōme.

<sup>9</sup> Kymarokõ tymenekase Ritonõpo a kyzehno xine pyra ehtohme. Kypynanohtohkõme tymenekase sytatose Kuesëkõ Jezu Kyrixtu a, toorihse

<sup>10</sup> exiryke kymyakäkõme, imaro kuehtohkõme, orihpynomo, aorihtyamo, enara ehtohme.

<sup>11</sup> Morara exiryke oxijamihtanohtoko. Atakorehmatoko kurehxo Ritonõpo omiry enetupuh-tohme. Morara awahtao xine moro saaro atakorehmãko matose.

### *Pauru nurutopõpyry etyhpyryme*

<sup>12</sup> Wekyry tomo, ynara kakehpyra oya xine ynanase, Ritonõpo omiry poko ãmorepanekõ zunõ ehtoko, Ritonõpo nymenekatyãme toto exiryke. Tymenekase Ritonõpo a oesëkõme toto ehtohme. Tymenekase roropa toto tõmiry poko ãmorepanekõme.

<sup>13</sup> Toto zunõpo rokë pyra ehtoko. Ipyno xine roropa ehtoko, toto erokuru pokoino ãkorehmarykõ poko. Kure rokë ehtoko, oseosezuhpyra, ãko ynanase oya xine.

<sup>14</sup> Wekyry tomo, ynara ãko roropa ynanase oya xine. Akĩme exiketõ akinuru irumekapoto. Iporemãtyã ijamihtanohpotoko ropa. Ihxipÿke exiketõ imehnõ zururu poko Jezu enetuputyry poko tyya xine akorehmatoko imehnõ zurutohme. Imehnõ maro kure ehtoko, sekereme.

<sup>15</sup> Popyra imehnõ oya xine ahtao, onemetakãmara ehtoko. Kokoro rokë kure ehtoko oseya. Kokoro rokë kure imehnõ tyritoko roropa.

<sup>16</sup> Atãkyematoko kokoro rokene.

<sup>17</sup> Oturukehpyra ehtoko Ritonõpo netaryme.

18 “Kure mase, Ritonõpo,” kahtoko eya. Emero popyra ahtao, morara kahtoko ro eya. “Kure mase,” kakehpyra rokẽ ehtoko. Morara kary etary se Ritonõpo oya xine mana, Kyrixtu Jezu poetoryme oexirykõke.

19 Tomeseke ehtoko Ritonõpo Zuzenu anako-rekehkara oehtohkõme.

20 Ritonõpo poe urutõ kõ omihpyry oseunohtou.

21 Urutõ kõ nekarohpyry ikuhtoko zuaro oehtohkõme. Kurã rokẽ imenekatoko aomipona oehtohkõme.

22 Oorypyrykõ irumekatoko porehme, iiryryryme pyra oehtohkõme.

23 Ynara ãko ynanase Ritonõpo a opoko xine: “Papa Kapuaono, torëtyke pyra yna rineme mase. Onukurãkatyã Tesaronika põkõ ewomako ipunaka, zokokomo, zuzenukomo, aomirykomo, enara. Ipynanohko toto iiryryryme pyra toto ehtohme, ehxiropyra toto ehtohme yna esẽ Jezu Kyrixtu oepyry ropa ahtao,” ãko ynanase Ritonõpo a.

24 Kure mã mokyro Kueahmanekomo. Tõmipona kuehtohkõme kueahmatose. Tamoreme typoe-toryme kyritorÿko mana. Zae mokyro mana. Tõmihpyry anamonohpyra mana.

25 Wekyry tomo, oturutoko Ritonõpo a yna poko.

26 Jezu poetory tõ zuruko. “Pauru ose xine ro mana ipunaka,” kahtoko eya xine.

27 Ynara ãko ase oya xine Kuesëkõ omi poe: “Sero ynymerohpyry isekerematoko imoihmãkõ netaryme Jezu poetory tõ netaryme,” ãko ase.

<sup>28</sup> “Papa Kapuaono, kure rokē Tesaronika pōkō tyriko,” āko ase Jezu Kyrixtu Kuesēkomo a opoko xine. Enara.

្ក  
**Khmer Standard Version of the Holy Bible in  
the Khmer Language of Cambodia**

Copyright © 1997, 2005 The Bible Society in Cambodia

្ក

© រក្សាសិទ្ធិដោយសមាគមព្រះគម្ពីរសកល

គ្រប់ ផ្នែក នៃ សៀវភៅ នេះ មិន ត្រូវ បាន ផលិត ឬ ប្រើប្រាស់ តាម ទំរង់ ឬ មធ្យោបាយ បែប អេឡិចត្រូនិក ឬ ម៉ាស៊ីន ណាមួយ រួម ទាំង ការ ថត ចំលង អាត់ សំលេង ផ្ទុក នូវ ទិន្នន័យ ប្រព័ន្ធ ណាមួយដែលអាចយកមកប្រើ ដោយគ្មានការអនុញ្ញាតពីសមាគមព្រះគម្ពីរកម្ពុជា។ ប្រសិនបើ មានការដកស្រង់អត្ថបទគម្ពីរចាប់ពី ១០០០ខ ឡើងទៅ ត្រូវសុំការអនុញ្ញាតពីសមាគមព្រះគម្ពីរ កម្ពុជ

Quotations of the Bible in Khmer Standard Version in any form, must obtain written permission from the Bible Society in Cambodia if the quoted material is inclusive of at least 1,000 verses, or a copy of any book wholly or partially, which amounts to 50% of the book quoted. For any long quotation, notice of copyright must appear as follows: Text copyright © 1997, 2005 United Bible Societies. Used by permission.

---

PDF generated using Haiola and XeLaTeX on 25 Apr 2025 from source files dated 26 Apr 2025  
fc9611d4-b5f2-5730-b6c2-58f2658eac89